

6365 - Projet de loi portant création du Sportlycée

Här President, léif Kolleegeinnen a Kolleegeen, fir d'éischt wëll ech dem Rapporteur, dem honorabelen Här Haagen, Merci soe fir säin exzellente schrëftlechen a mëndleche Rapport. Ech hu mech virun e bësse méi wéi engem Joer a menger éischter Ried hei an dësem héijen Haus fir Strukture wéi de Sportlycée ausgeschwat. A wéi Dir Iech virstelle kënnt, sinn ech als fréier Sportlerin haut immens frou, dass de Sportlycée elo endlech eng legal Basis kritt an doduerch zu engem feste Bestanddeel an eiser Schoullandschaft gëtt.

Mir hunn an eisem klengen Land ëmmer méi Sportler, déi op internationalem Niveau mat deene Beschte mathale kënnen. Wéi Dir all wësst, vun näischt kënnt näischt! Dat heescht, och am Sport muss ee vill schaffen an investéieren, fir un d'Spëtzt ze kommen an dat, a mengen Aen, ëmmer méi, well an alle Länner gëtt de Sport ëmmer méi professionell organiséiert. Duerfir ass et wichteg, datt eis jonk Talenter scho fréi optimal Konditiounen geschafte kréien, déi hinnen de Wee no uewen erméiglechen. Aus all jonkem Talent ka sécherlech net herno en Topathlet ginn. Mä wann et der nëmme e puer a lues a lues ëmmer méi ginn, déi et packen, dann hu mir eppes erreicht. Mir sollten nämlech net vergiessen, wat fir een enormen Enjeu de Sport huet, an houbrecht sinn op eis Sportler, déi de roude Léiw an d'ganz Welt erausdroen.

An dësem Sënn sinn 1989 d'Centres de formation um INS an 1997 d'Sportssektioun vun der Arméi entstanen. 1998 ass ee groussherzoglecht Reglement a Kraaft getrueden, wat verschidde speziell Moosname fir Héichleistungssportler an awer och fir talentéiert Museker am Secondaire erméiglecht. 2001 sinn d'Sportsklassen am Lycée Aline Mayrisch agefouert ginn a säit 2007 leeft de Projet "sports-études" um Site vum INS als Annex vum Lycée Aline Mayrisch. D'"sports-études", "Sportgymnasien" oder "Sports schools" gëtt et méttlerweil an all europäeschem Land. An och Lëtzebuerg mécht mat dësem Gesetz elo keng Ausnahm méi.

Här President, de Statsrot hat a sengem Avis vum 20. März d'Artikelen 11 an 12 iwwert d'Admissioun vun de Schüler am Sportlycée contestéiert an ee groussherzoglecht Reglement mat Opnahmekritäre fir all Sportler gefuerdert. Deem ass Rechnung gedroe ginn, andeems elo méi kloer aus dem Artikel ervirgeet, dass och Schüler, déi net vun enger Federatioun proposéiert ginn, eng Kandidatur fir an de Sportlycée stellen an no deene selwechte Kritären opgeholl kënnen ginn. Dass de Sportlycée och virdu schonn oppe war fir esou Démarchen, weist d'Beispill vun enger jonker Schachspillerin, déi d'lescht Joer aus eegener Initiativ hiren Dossier eragereecht hat an ugeholl ginn ass.

D'Rechter an d'Flichten tëschent dem Sportlycée an de Federatiounen ginn duerch Konventiounen geregelt. Esou kann hei zum Beispill festgeluecht ginn, dass a verschiddene Sportarten d'Plage horaire vun der Préparation physique générale, déi vum Lycée ugebuede gëtt, vun der Federatioun fir sportartspezifischen Training genotzt gi kann.

Ech wëll awer och ënnersträichen, dass et sech beim Sportlycée vum Schoulsystem hier ëm e ganz normale Lycée handelt, deen d'Schüler op e Premièresexame vun enger vun den aktuelle Sektione preparéiert an hinne gläichzäiteg d'Méiglechkeet bitt, hire Sport op héijem Niveau ze praktizéieren. All Schoul huet dräi Stonnen Autonomie an de Fächer, déi si um Stonneplang ubidden. An d'Fächer, déi am Sportlycée duerch de Sport ersat ginn, si keng Promotionsfächer, mä vun Troisième bis d'Première zum Beispill Optionsfächer.

Dëst ass ee wichtege Punkt am Kontext vun den aktuellen Debatten iwwert d'Schoulreform, wou déi zwou proposéiert Dominanten déi verschidde Sektioneen ersetze sollen. Et gëtt vill driwwer geschwat, dass d'Konscht an d'Musekssektioun ewechfale géifen. Ma ähnlech Strukture wieren och hei unzedenken, virun allem, well d'groussherzoglecht Reglement vun 1998 sech jo och op jonk Museker bezitt.

Well et sech, wéi gesot, ëm en normale Lycée handelt, ass de Wiessel an en anere Lycée och zu jidder Zäit méiglech, wat an eisen Aen ee ganz wichtege Punkt ass. Et muss een nämlech wëssen, dass eng Struktur wéi de Sportlycée net dat Richtegt fir all Kand oder Jugendlechen ass. Et gëtt immens vill vun de Schüler verlaangt, well si souwuel an der Schoul wéi och um sportleche Plang Leeschtung an Disziplin weise mussen. Dacks weist sech, dass grad Leeschtungssportler gutt mat dëser Charge ëmgoe kënnen, well si vu klengem u gewinnt si sech gutt ze organiséieren, fir alles ënner een Hutt ze kréien. Déi Schüler, déi op Septième direkt an de Sportlycée ginn, gewinne sech lues a lues un de Rhythmus Schoul a Sport, well op den ënneschte Klasse manner Trainingsunitéiten um Stonneplang sti wéi bei de Groussen.

Mä de Sportlycée ass awer och op fir Quereinsteiger, dat heescht fir Schüler, déi virun an engem anere Lycée waren. Hei kann et emol sinn, dass et dës Kanner méi schwéier fällt sech un de Rhythmus ze gewinnen a gläichzäiteg d'Anonymat vun enger méi grousser Schoul opzeginn. Am Sportlycée sinn am Moment just ronn 300 Schüler, an den enken Encadrement duerch Proffen, Tuteur, Trainer, Kiné a Psycholog mécht, dass all Schüler bekannt ass.

Den Drop-out, dat heescht déi Schüler, déi d'Schoul wiesselen, läit bei 6 bis 7% pro Joer. D'Grënn fir den Drop-out kënnen, nieft de schonn ugeschwatene Ursachen, sportlech Resultater, Problemer mat der Federatioun oder och de Frëndeskrees sinn. Deen anere Fall gëtt et awer och, an zwar, dass Sportler, och wa se net méi am Kader sinn oder wëlle sinn, trotzdem am Sportlycée bleiwe wëllen. Hei besteet d'Méiglechkeet fir säi Joer fäerdeg ze maache respektiv nach ee Joer weider ze bleiwen, zum Beispill fir net eng Première duerch e Wiessel no der Deuxième ze gefährden.

Nieft dem Leeschtungssport wëllt de Sportlycée awer och aner Beräicher ofdecken an d'Kanner fir en nohaltegt Engagement am Sport motivéieren. Dowéinst bitt de Sportlycée ab nächstem Joer Modular vun Troisième bis d'Première u fir Schüler, déi net méi an der Federatioun sinn an awer dem Sport erhale bleiwe wëllen, zum Beispill als Trainer oder als Arbitter. Verletzte Sportler hunn natierlech eng Karenzzäit, fir nees op d'Been ze kommen, a mussen net direkt de Lycée wiesselen.

A puncto Wiessel ass et och wichteg ze erwähnen, dass de Sportlycée mat anere Lycéeën kooperéiert. Vu dass de Sportlycée just de Cycle inférieur am Technique ubidde kann, mussen d'Schüler no der Neuvième an en anere Lycée wiesselen. De Lycée technique vu Bouneweg zum Beispill gëtt de Schüler d'Méiglechkeet hire Stonneplang esou ze aménagéieren, dass si awer nach bis zu zweemol moies am Sportlycée trainéiere kënnen.

Och bei de Proffen huet een e gewëssenen Drop-out, well och vun hinne vill Flexibilitéit an Disponibilitéit verlaangt gëtt. Am Sportlycée schaffen, heescht deelweis Prüfungen an dräifacher Ausféierung maachen, well d'Schüler bedéngt duerch Kompetitiounen a Stagë méi oder manner dacks feelen. Am Fall vun esou Absencë gëtt de Prof hinnen Aufgabe mat op den Déplacement, an dës ginn dann nom Retour verbessert. Déi 72 Disponibilitétsstonnen, déi all Prof am Laf vum Schouljoer ze realiséieren huet, ginn an den Tutorat investéiert, well am Sportlycée huet all Schüler een Tuteur.

De Rekrutement vun de Proffen ass awer d'selwecht wéi an anere Schoulen. A bis elo waren nach ëmmer genuch Interessenten do, déi sech an de Sportlycée gemellt hunn. Et sinn d'ës normalerweis Leit, déi e gewëssene Lien zum Sport hunn a sech an d'ësem Sënn engagéiere wëllen. Vill vun den Enseignantë sinn net exklusiv am Sportlycée, mä ënnerrichten och nach an anere Gebaier, wat gutt ass, well si esou d'Leeschtunge vun de Schüler aus dem Sportlycée mat deenen aus anere Lycéeë vergläichen an deemno wéi ajustéiere kënnen.

Hei ass ze bemierken, dass d'Resultater vun den Épreuves communes an der Moyenne leien, an am Premièresexamen vun d'ësem Joer 14 Schüler direkt gepackt hunn - dovunner eelef mat der Mention "bien" an ee mat der Mention "très bien" -, dräi een Noexamen hunn a keen duerchgefall ass.

De schouleschen an de sportlechen Erfolleg kommen net vun näischt. Et muss ee soen, dass wierklech vill gemaach gëtt, fir dem Schüler a Sportler op sengem Wee no uewen ze hëllef. Nieft den Absencë fir Kompetitiounen a Stagen, déi d'ailleurs bei schlechte schoulesche Leeschtungen net autoriséiert ginn, dem Neschreiw vu Prüfungen, de schouleschen Hëllefsmesuren an dem Tutorat kommen nach aner wichteg Punkte wéi d'Verletzungspreventioun an Réathlétisatioun duerch Kinéen, de medezineschen Encadrement duerch Dokter an d'Méiglechkeet vun enger psychologescher Betreuung virun an no de Kompetitiounen derbäi.

Här President, Kolleeginnen a Kolleegen, déi wierklech Leeschtungen, souwuel am schoulesche wéi och am sportleche Beräich, kommen awer nëmme duerch eng gutt Kommunikatioun an Zesummenaarbecht vun alle Verantwortlechen zustan. An dat ass eiser Usicht no déi gréissten Erausforderung am Sportlycée.

D'Proffe musse mat den Traineren iwwer e Prüfungs- a Kompetitiounsprogramm kommunizéieren. D'Trainere vum Verband, déi jo an der Schoul intervenéieren, an déi vum Veräin, musse sech ofstëmmen, fir eng Iwwerbelaaschtung vum Athlet ze verhënneren. D'Verbandstraineren, déi d'Sportart, de spezifeschen Training am Sportlycée halen, an d'Sportsproffen, déi de Schoulsport an déi physesche Preparatioun ofhalen, musse sech och regelméisseg ofschwätzen. An d'Eltere si souwiesou an all d'ëse Beräicher involvéiert.

D'ës ass net ëmmer einfach ze realiséieren an immens zäitopwendeg, mä duerch regelméisseg Réuniounen am Laf vum Schouljoer kommen déi verschidden Acteuren zesummen a Problemer kënnen aus dem Wee geraumt a Léisunge fonnt ginn.

Wéi Dir gesitt, sinn d'Schüler immens gutt encadréiert an et gëtt vill op den eenzelne Schüler agaang. De Revers vun d'ëser enker Betreuung ass leider dacks eng Attitud vun eenzelne Kanner, déi ze vill gewinnt sinn, dass alles fir si gemaach gëtt. Esou ass dee gréissten Défi hinne verstoen ze ginn, dass si déi Haaptverantwortlech vum Erfolleg sinn an et drëms geet, d'Struktur Sportlycée optimal ze notzen. Hei muss d'Schoul esou wäit changéieren, dass verschidden Erliichterunge sech mussen erschafft ginn, och duerch Fläiss, Asaz a Behuelen an der Schoul, esou dass net méi alles eng Selbstverständlechkeet ass.

D'ës Feststellung werft d'Fro op, ob e Lycée, deen nëmme Sportler ophëlt, net ze vill eesäiteg ass, an ob et net besser ass, wann d'Sportler och mat Schüler, déi aner Interessen hunn, zesummekommen. Hei ginn d'Meenungen auserneen an et kéint ee stonnelaang iwwert d'Viran d'Nodeeler vun deem engen oder anere Modell debattéieren.

Ee Fakt ass awer, dass en eegene Lycée um organisatoresche Plang einfach enorm vill Avantagen huet. An dach ass et de Responsabele vum Sportlycée immens wichtig, dass hir Schüler net nëmmen den Tunnelbléck Sport hunn, an engagéiere sech dofir, si zu kriteschdenkenden a responsabele Bierger ze forméieren.

D'Proffé vun enger Klass sëtzen dräimol d'Joer zesummen, fir de Programm festzeleeën an esou nieft Schoul a Sport och verschidde Preventiounsthemmen oder Kulturelles fächeriwwergräifend unzepaken. Esou huet de Sportlycée zum Beispill een interne Curriculum vum der Preventioun, dee vu Septième bis Première Theme wéi Wäerteunterricht, Éischt Hëllef, Zäitmanagement, Anti-Doping, gesond Ernährung a mentalen Training, mä och Muséesvisiten oder Theateropféierunge beinhalt.

A puncto Infrastrukturen ass scho gesot ginn, dass et esou ausgesäit, wéi wann déi nei Gebailechkeete fir d'Rentrée 2012-2013 fäerdeg ginn a Plaz fir eng 480 Schüler bidden. D'Kantin vum INS ass scho virun enger Zäit vergréissert ginn a kann elo vun alle Schüler genotzt ginn. Problematesch bleift allerdéngs den Transport bis op de Site vum Sportlycée. Dacks sinn aner Lycéeë méi attraktiv, well d'Schüler mam öffentlechen Transport ronn 30 Minutten éischer um Lampertsbierg oder um Geesseknäppche sinn.

D'Internat, wat an de Sportlycée integréiert gëtt, bitt hei virun allem de Sportler, déi méi e wäite Schoulwee hunn, eng interessant Méiglechkeet. Déi 110 Ufroe fir eng Plaz am Internat weisen, dass wierklech e Besoin do ass. Wann dann nach, wéi geplangt, an der nächster Zäit ee Parking an eng zweet Sportshal um Site realiséiert ginn, da kann een, mengen ech, vun enger gutt équipierter Struktur schwätzen.

Wéi Dir gesitt, ass a gëtt vill an de Sportlycée investéiert. Dofir kann ee sech déi berechtigt Fro stellen, wouhin dës Investitiounen op laang Siicht féieren. Eiser Meenung no wier dëst d'Formuléierung vun enger richteger Héichleeschtungssportpolitik hei zu Lëtzebuerg. Et kéint ee sech eng spezialiséiert Cellule fir Héichleeschtungssportler ënnert der Autoritéit vum Département ministériel des sports an Zesummenaarbecht mam Comité Olympique virstellen, déi net nëmmen eng finanziell a medezinesch Ënnerstützung bidden, mä och beim Choix vun der Uni a bei der Karriereplanung hëllef kéint.

Eng geziilten Orientatioun vum Schüler a Sportler no sengem Ofschloss am Sportlycée feelt nämlech. Bis dato ass näischt Konkretes a puncto Karriereplanung virgesinn, fir dem Abiturient ze hëllefeng eng Uni ze fannen, wou hie souwuel seng Studien, ma och säi Sport op engem gewëssenen Niveau weiderféiere kann. Hie muss sech hei op seng Federatioun verloossen, déi awer net onbedéngt Zäit an déi noutwendeg Informatiounen, Kontakter a Kompetenzen op schouleschem Plang huet, fir weiderzehëllefeng. An dësem Kontext wier et ze begréissen, wann de Sportsministère zesumme mam Héichschoulministère Kritäre festleeën a Proposen zu enger Héichleeschtungssportpolitik ausschaffe géif.

Ofschléissend ginn ech den Accord vun der CSV-Fraktioun, a wëll awer och nach dem Chargé de direction Raymond Conzemius an der ganzer Équipe ronderëm hie félicitéieren. Si sinn et, déi de Sportlycée duerch hiren onermiddlechen Asaz am Sënn vum Sport a vun de Kanner zu deem gemaach hunn, wat en haut ass. Ech wënschen hinne vill Erfolleg am neie Gebai an dass nach vill weider Aushängeschëlde wéi ënner anerem de Raphaël Stacchiotti oder de Bob Jungels erauskommen.

Ech soen Iech Merci fir d'Nolauschteren.